

KOMUNIKADO DI PRENSA

BTP TA SIGUI BOU DI E NÒMBER 'REGULATORY AUTHORITY OF CURAÇAO' KU BASE FIRME FIHÁ RIBA 25 AÑA DI KONFIANSA KOMO REGULADÓ

Willemstad, 30 di Mart 2021 - Bureau Telecommunicatie & Post (BTP), durante di un webinario na okashon di su selebrashon di 25 aña komo reguladó di varios sektor na Kòrsou, a presentá su identidat nobo kual ta 'Regulatory Authority of Curaçao' (RAC). RAC ta e nòmber bou di kua regulashon multi-sektoral di un organisashon kreá riba e mesun fundamentunan fuerte di BTP, lo profilá su mes rumbo pa futuro. Durante e último 25 aña e organisashon a desaroyá i bira un reguladó di multiple sektor. Esakinan a bin dilanti durante e webinario, kaminda ekspertonan di RAC a elaborá riba desaroyonan pa loke ta trata regulashon di sektornan di pòst, energia, telekomunikashon, èrport i salubridat, mientras a duna tambe un bista kon RAC, komo reguladó, aktualmente ta atendé ku esakinan.

Na inisio di e webinario ku a karga e nòmber "**Towards a multi-sector regulator focused on future market developments**", Minister enkargá ku Transporte, Tráfiko i Telekomunikashon, Sra. Zita Jesus-Leito, i Minister enkargá ku Desaroyo Ekonómiko, dr. Steven Martina, a tene un introdukshon huntu ku direktor di BTP Sr. Franklin Sluis, ku a duna apertura na esaki. For di dia ku a funda BTP na promé di Yanüari 1996, komo un departamentu di Gobièrnu, BTP a desaroyá su mes den un reguladó respetá pa su konosementu, ekspertisio i regulashon hustu. Un reguladó ku ta keda konfiá pa regulá multiple sektor den nos komunidad, i ta duna konseho riba tereno di tarifa di salubridat i tarifa di transporte. Mas i mas, BTP ta keda konsultá tambe pa otro materia abase di e konfiansa ku tin den e organisashon i su ekspertonan. Ta hasi hopi mas uso di e konosementu ku tin na BTP den yuda desaroyá entre otro nos *Smart Nation* (Pais Sabí) òf desaroyo di nos profeshonalnan pa okupá trabounan di futuro pa medio di Institute for Professional Excellence. Últimamente BTP a asistí tambe den implementashon di digitalisashon di nos skolnan. E desaroyonan importante aki ta krea e base pa BTP posishoná Kòrsou pa partisipashon i konekshon den plataformanan internashonal.

Mientras ku BTP a krea un fundeshi fuerte durante e último 25 aña, e úniko kos ku a keda konsistente tabata kambio, i kambionan ku impakto grandi. Konsiente ku 'nos mañan - nos ta kreé awe', BTP a lansa su nòmber 'Regulatory Authority of Curaçao' (RAC) i alabes e identidat den kua e reguladó ta transformá su mes den dje rumbo pa futuro: E símbolonan ta personifiká unidat den e tres areanan riba kua e organisashon ta regulá, esta ekonomia, e area hurídiko i téknologia, sirbiendo e tres gruponan primordial kual ta komunidad, gobièrnu i industria. Ta trata di un wil di balor, simbolisando regulashon kaminda ta nesesario i e parti mas kla ta simbolisá e transparensa den regulashon.

Kompartí konosementu ta un parti importante di RAC su empeño pa keda konektá ku e komunidad ku e ta sirbi. Pa e motibu aki a skohe pa un webinario kaminda e ekspertonan di RAC, sr. Curt Belfor, sr. Edwin Bogert i sr. Giovanni King a elaborá riba e areanan di ekspertisio i despues a interkambiá ku e publiko ku a partisipá na e webinario. Bou di e nòmber 'Regulatory Authority of Curaçao', e organisashon lo sigui dal paso pa dilanti pa por sigurá ku komunidad por konta ku e balor agregá di su servisionan komo reguladó.